



**SAMOSTALNI SINDIKAT DRŽAVNIH SLUŽBENIKA
I NAMJEŠTENIKA U ORGANIMA DRŽAVNE SLUŽBE,
SUDSKOJ VLASTI I JAVNIM USTANOVAMA U FBIH
Obala Kulina bana br. 1
S A R A J E V O**

**Broj: 01-IV-591-3/16
Sarajevo, 20.12.2016. godine**

**P R A V I L N I K
o finansijskoj pomoći i drugim materijalnim davanjima članovima
Samostalnog sindikata
/ PREČIŠĆENI TEKST/**

I - OPĆE ODREDBE

Član 1.

Ovim Pravilnikom uređuju se uvjeti, procedura, kriteriji, iznos i način ostvarivanja finansijske pomoći i drugih materijalnih davanja, koja se dodjeljuje članovima Samostalnog sindikata državnih službenika i namještenika u organima državne službe, sudskoj vlasti i javnim ustanovama u Federaciji Bosne i Hercegovine /u daljem tekstu Sindikat/.

Član 2.

Ovaj Pravilnik jedinstveno se primjenjuje u svim organizacionim dijelovima Sindikata, a Sindikalne organizacije u postupanju po ovom pravilniku, dužne su donijeti usklađene kriterije za ostvarivanje finansijske pomoći i drugih materijalnih davanja koja dodjeljuju članovima Sindikata.

Za primjenu svih odredaba ovog Pravilnika odgovorna je Komisija za dodjelu finansijske pomoći, /u daljem tekstu Komisija/, koju čini 5 članova, a koji se imenuju u skladu sa Statutom na period od četiri godine iz reda istakutih članova Sindikata.

**II - UVJETI I PROCEDURA ZA DODJELU FINANSIJSKE POMOĆI
I DRUGIH MATERIJALNIH DAVANJA**

Član 3.

Finansijska pomoć i drugo materijalno davanje dodjeljuje se članovima Sindikata, a samo u izuzetnim slučajevima Komisija može odobriti finansijsku pomoć izdržavanom članu uže porodice koji nije u radnom odnosu (bračni partner ili dijete do 18 godina starosti, odnosno do 26. godina starosti u koliko se dijete nalazi na redovnom školovanju).

Član 4.

Finansijska pomoć se dodjeljuje iz djela ukupnog prihoda Sindikata, a koji je utvrđen Finansijskim planom prihoda i rashoda za ove namjene u toku jedne kalendarske godine.

Član 5.

Zahtjev za dodjelu finansijske pomoći ili druga materijalna davanja, član Sindikata podnosi predsjedniku Sindikalnog odbora Sindikalne organizacije, koji odlučuje o opravdanosti zahtjeva.

Predsjednici Sindikalnih odbora opravdane zahtjeve sa potpunom dokumentacijom dostavljaju na rješavanje Komisiji u roku od 15 dana od dana prijema zahtjeva.

Član 6.

Podneseni zahtjevi koji ne sadrže odgovarajuću potrebnu dokumentaciju za razmatranje i odlučivanje, neće se razmatrati, dok se ne dopune neophodnom dokumentacijom, odnosno, može se tražiti dopuna zahtjeva sa dostavljanjem potrebne dokumentacije u roku ne dužem od 30 dana. Ukoliko se u ostavljenom roku ne dostavi potrebna dokumentacija, podneseni zahtjev će se odbiti.

Član 7.

Zahtjev Sindikalne organizacije upućen Komisiji za dodjelu finansijske pomoći treba da sadrži slijedeću dokumentaciju;

- medicinska dokumentacija ne starija od 6 mjeseci,
- potvrdu o nastaloj i utvrđenoj šteti usljed elementarne ili druge nesreće izdatu od nadležne službe,
- prijavnicu o mjestu boravka (ukoliko se zahtjev odnosi za naknadu štete usljed elementarne nepogode,
- kućna lista,
- potvrda da je član porodičnog domaćinstva izdržavano lice koje ne ostvaruje dohodak po bilo kom osnovu,
- račun o uplati participacije ili drugih materijalnih troškova u skladu sa kriterijima ovog pravilnika,
- odluka o dodjeli sredstava od strane Sindikalne organizacije.

Član 8.

Komisija za dodjelu finansijske pomoći i drugih materijalnih davanja članovima Sindikata, razmotrit će svaki podneseni zahtjev pojedinačno, a u skladu sa odredbama ovog Pravilnika i u skladu sa Finansijskim planom i mogućnostima Sindikata odobravati propisane iznose za isplatu finansijske pomoći.

O opravdanom zahtjevu Komisija se izjašnjava donošenjem Odluke o dodjeli finansijske pomoći ili drugog materijalnog davanja.

O neosnovanim zahtjevima Komisija obavezno donosi Odluku, koja se dostavlja predsjedniku Sindikalnog odbora Sindikalne organizacije.

Predsjednik Sindikalnog odbora dužan je u roku od 7 dana od dana prijema Odluke, istu dostaviti podnosiocu zahtjeva na uvid.

III - KRITERIJI ZA DODJELU FINANSIJSKE POMOĆI

Član 9.

Kriteriji za dodjelu finansijske pomoći i drugih materijalnih davanja od strane Sindikata su:

- da je podnosilac zahtjeva član Sindikata najmanje 12 mjeseci u kontinuitetu,
- da podnosilac zahtjeva ispunjava sve uvjete propisane ovim pravilnikom,
- da podnosilac zahtjeva živi u istom domaćinstvu sa članovima porodice koji nisu u radnom odnosu,
- da podnosilac zahtjeva trajno oboljenje-invaliditet nije stekao na radnom mjestu,
- da podnosiocu zahtjeva nije omogućeno ili dostupno ostvarivanje prava na zdravstvenu zaštitu i zdravstveno osiguranje na teret Fonda zdravstvenog osiguranja Kantona ili Federacije,
- da podnosilac zahtjeva koristi terapiju i lijekove koji nisu na esencijalnoj listi Kantona ili Federacije BiH,
- da je podnosilac zahtjeva nezakonito otpušten sa posla.

Član 10.

Finansijska pomoć ili drugo materijalno davanje od strane Sindikata dodjeljuje se u slijedećim iznosima;

- za teža ili teška oboljenja koja nije moguće tretirati na teret Fonda zdravstvenog osiguranja, u iznosu do **500 KM**,
- za nezakonit otkaz sa posla, uz obezbjeđenje pravne zaštite u toku jedne kalendarske godine **100 KM mjesečno**
- za štetu od elementarnih nepogoda i drugih nesreća **200 - 500 KM**.

Član 11.

Finansijska pomoć i drugo materijalno davanje koje se obezbjeđuje u Sindikalnoj organizaciji i u Sindikatu, može se izvršiti na osnovu donesene odgovarajuće odluke Sindikalnog odbora ili imenovane Komisije za dodjelu novčane pomoći, a u posebnim slučajevima utvrđenim ovim Pravilnikom i Odluke predsjednika Sindikata, a da se na na prvoj narednoj sjednici Upravnog odbora verificira takva Odluka predsjednika.

IV - NAČIN OSTVARIVANJA FINANSIJSKE POMOĆI

Član 12.

Finansijska pomoć članovima Sindikata se dodjeljuje u iznosima definiranim ovim Pravilnikom ili participacijom u plaćanju računa koji se odnosi na liječenje koje nije moguće obavljati na teret Fonda zdravstvenog osiguranja, kupovinom lijekova koje nisu na esencijalnoj listi Kantona ili Federacija BiH kao i u slučaju drugih materijalnih izdataka nastalih usljed elementarnih i drugih nesreća.

Član 13.

U slučajevima nezakonitog otkaza sa posla člana Sindikata, dok traje postupak pravne zaštite obezbijeđen od strane Sindikata, članu Sindikata vršit će se mjesečna isplata novčane pomoći shodno članu 11. ovog Pravilnika.

Novčana pomoć iz stava 1. ovog člana isplaćivat će se do konačnog rješavanja postupka zaštite prava, ali ne duže od jedne godine.

Član Sindikata, kojem je isplaćivana mjesečna novčana pomoć u postupku pravne zaštite, nakon pravosnažnog okončanja sudskog postupka, donesenog u korist člana Sindikata, a po naplati potraživanja iz radnog odnosa, dužan je vratiti Sindikatu cjelokupan iznos isplaćene novčane pomoći.

Član 14.

Finansijska pomoć i drugo materijalno davanje, u slučajevima elementarnih nepogoda i drugih nesreća, odobrava se Odlukom o isplati jednokratne novčane pomoći ili kupovinom neophodnih sredstava za preživljavanje na zahtjev člana Sindikata.

Član 15.

Finansijska pomoć i druga materijalna davanja predviđena ovim Pravilnikom, dodjeljivat će se samo članovima sindikalnih organizacija koje plaćaju članarinu u skladu sa odredbama člana 78. Statuta Samostalnog sindikata, te zaključka Upravnog odbora o statutarnosti.

Finansijsku pomoć i druga materijalna davanja iz stava 1. ovog člana, koja se obezbjeđuje od strane Sindikata članovi mogu ostvarivati jednom u dvije godine.

Finansijska pomoć po istom pravnom osnovu ostvaruje se samo jedanput od strane Samostalnog sindikata.

Član 16.

Na Odluku Komisije za dodjelu finansijske pomoći Samostalnog Sindikata, koja se dostavlja na ime podnosioca zahtjeva za dodjelu finansijske pomoći i drugog materijalnog davanja ili Sindikalnoj organizaciji čiji je član podnosilac zahtjeva, isti mogu izjaviti žalbu Izvršnom savjetu Samostalnog Sindikata u roku od 15 dana od dana prijema Odluke.

O žalbi iz stava 1. ovog člana, Izvršni savjet Sindikata dužan je odlučiti u roku od 30 dana, od dana prijema iste.

Član 17.

Ovaj Pravilnik stupa na snagu danom donošenja.

Član 18.

Stupanjem na snagu ovog Pravilnika prestaje da važi Pravilnik o finansijskoj pomoći i drugim materijalnim davanjima članovima Samostalnog sindikata državnih službenika i namještenika u FBiH, broj: 01-IV-353/10 od 15.4.2010. godine, kao i njegove izmjene br. 01-IV-965/11 od 23.12.2011. godine.

Predsjednik

Salih Kruščica, master pravnik